



## De Stoomtram anno 1922.

Heel in de varte klinkt een rommelend geluid. As ie goed kiek't zie' j tussen de weilaanden een donkere slange ankommen. Een grote zwarte rookplume hangt der boven. Langzaam waeiert de rook uut over 't laand. De slange en ok de rookwolke wördt gauw groter. Een stoomflute gilt en mit veul gepuf en geroatel kump de tram bij Gerrits uut de polder.

Op beide ziedkaanten van de lokemetieve is een ovale bronzen plate an-ebracht mit 'n nummer en de heufdletters D.S.M., waaromhen in kleinere letters "Dedemsvaartsche Stoomtram Maatschappij".

Achter de lokemetieve bint een tweetal personenrietugen ekoppeld, an de veur- en achterkaante

veurzien van 'n balkon. Via twee brede treeplaanken kunt de passeziers in- en uutstappen in de barm langs de Dedemsvoart. Perrons ken'nen ze toen nog niet.

Achter de personenwagens eerst een dichte goederenwagon mit aan weerszieden 'n grote schoefdeure; doarachter twee platte wagens beloaden mit pakken törfstrooisel.



Bij het "Jachthuis" stopt de tram mit piepende remmen. Stoom sist an alle kaanten uut 't lokemetiefien.


Een klein mannechien mit schieve ogen en een gelige geloatskleur, vermoedelijk 'n handelsreiziger, stapt uut. Mit een grote zwoare leren koffer stapt hi'j de gelagkamer van hotel-café "t Jachthuis" in.

Twee vrouwlou in lange donkere maantels, mit grote hoeden op en elk mit een zwart rieten "spoormaantien" in de haand, stapt in.

De kondukteur, herkenboar an de kaartiestrommel op zien boek, zwaeit noar de masinist en stapt dan in d' achterste wagon.

De stoomflute loeit; knarpend zet de mesine an. De schörstien broakt vette rook uut. Puffend en knarsend zet de tram hum weer in beweging um een eintien verder, bij 't tramstasion van Lutten, weer te stoppen. Hier stiet, op een ziedspoor, 't trammechien veur Hardenberg kloar. Wat passegiers stapt hier over. Eveniens wördt wat goederen hier over-eladen.

Een kriegshaftig figuur stiet het geheel te bekieken. Een dikke keal mit 'n martiale snorre in een broen uniform. Op zien kepi stiet het woapen van Ambt-Hardenberg en um zien bienen



stevige leren bienkappen. Mit de doemen achter zien koppelriem, woaran 'n grote sabel hangt, stiet hi'j alles mit slimme oogies op te nemmen. Zien neuze is flink poars an-elopen, niet allenig van de koalde; de "braandewien mit suker" zal hieran wel niet vrömd ween. Veldwachter Jansen, in vol ornoat.

Weer giet de stoomflute. De masinist hef de stoker een paar flinke briketten in de vuurgang loaten gooien. Hi'j ver stelt de regelhandels, dreeit de stoomafsluter langzaam lös en de stoker löst tegeliekertied de remmen.

Grote rook- en stoomwolken komt uit de lokemetief en knarsend en slingerend over de wissels bi'j 't tramstation giet de tram op weg, richting Dedemsvoart en vandoar langs de voart en Lichtmis noar de endbestemming: Zwolle.